

Urkundenbuch der Abtei Sanct Gallen (Ed. Wartmann) Nr. 435

In nomine sanctae et individuae trinitatis Hluduwicus divina favente gratia rex Atoni et Odalricho ceterisque comitibus nostris in Alamannia consistentibus in domino salvatore salutem. Cognoscat industria vestra, quia Grimaldus ceterique fideles nostri nobis dixerunt, quod monasterium sancti Galli confessoris Christi in quibusdam causis talem legem nunc inter vos non habeat, qualem cetera monasteria et beneficia nostra habent. Et idcirco volumus, ut haec causa deinceps emendetur et idem monasterium talem legem habeat, qualem cetera monasteria et beneficia habent, videlicet ut res illius, ubi necessitas exierit, cum sacramento inquirantur, quia eandem potestatem et dominationem super hoc monasterium habere volumus, quam super cetera monasteria et beneficia nostra habemus. Si vero quislibet homo huic decreto et iussioni nostrae contradicere presumpserit, illum volumus, ut in nostram praesentiam venire faciat, ut nobis rationem reddat, cur iussionibus nostris contrarius existat. Taliter hanc iussionem nostram adimplete, qualiter gratiam nostram velitis habere.